


SVITTE
DES
MAXIMES
MORALES
ET
CHRESTIENNES.



A PARIS;
Chez CARDIN BESONGNE ; rue
d'Escoffe, près S. Hilaire,

M. DC. XLIX.
AVEC PERMISSION.

REVUE
DES
MAXIMES
MORALES
ET
CHRETIENNES



A PARIS:
Chez CARDIN RESOUNE, 105,
d'Orléans, près St-Hippolyte.

M. DE L'IN
L'AN 1844



S V I T T E
D E S
M A X I M E S
M O R A L E S E T
C H R E S T I E N N E S.

L'Experience funeste de nos iours, ne nous fait que trop cognoistre à nos despens, quand d'ailleurs nous ne le sçaurions pas, qu'il est des maladies des Estats, comme de celles des corps naturels. Que celles qui sont legeres, ou ausquelles on pouruoit avec soing dès le commencement, sont faciles à guerir; mais si elles sont violentes, ou que par negligence, on ait souffert que le cancer, ou la gangrene se soient formez, les cures en ce cas passent pour miraculeuses, & il arriue bien souuent que les remedes que l'on applique ne seruent que pour augmenter la douleur, & irritant le mal auancer les iours du malade & le porter plus promptement au tombeau; D'où sont venus les Prouerbes, *Prenez garde au commencement, de*

crainte que la medecine ne vienne à tard; Et qu'aux extremes maux, il faut des remedes extremes.

Si la France eust fait reflexion il y a sixans , sur la conduite du Cardinal Mazarin. Si le Parlement à la veüe de son ambition & de son auarice , eust appliqué les remedes dont il se sert à present, l'Estat ne seroit pas dans la crise ou nous le voyons. Nous ne verrions point les torches allumées dans toutes les Prouinces. Nous ne verrions point les Estrangers à la solde de l'ambition & du despit, afin de sapper le Royaume par ses fondemens. L'interest & la passion n'ayant pas pris les racines quelles ont fait, nous ne verrions pas les diuisions entre les parens & les amis comme nous faisons. Et bien estoignez de ce malheur, qui faict voir la difference des Chrestiens d'auec les impies, & des bons François d'auec les meschants, nous iouirions dans la tranquillité de la paix, du repos, dont des Sujets fidelles deuroient iouir sous vn Prince tres-innocent comme tres-Chrestien.

Voila l'estat ou la France se trouue par vne trop grande, ie ne veux pas dire negligence, mais bien prudence ou condescendance, & auquel les lenitifs & les anodins sont à present inutiles. Il faut de puissants purgatifs pour chasser ces humeurs malignes, qui se sont comme changées en nature. Et c'est de là, que les armes, qui iusques à maintenant n'ont esté que sur la defensiue, n'ont de rien seruy, pour mettre les ennemis du Roy & de son Estat dans leur deuoir : & que tout ce qu'on a peu escrire pour la conscience, a esté trop foible, pour toucher le cœur, de ceux qui par leur obstination à persé-

cuter

ter les innocents, font manifestement cognoistre qu'ils sont du nombre des reprouuez.

On a donné cy-deuant au public, quelques Maximes Chrestiennes, qui, selon l'Euangile, marquent tous les devoirs tant de corps que d'esprit, des Sujets à l'endroit de leurs Souuerains : dans la creance que l'on auoit, que les Princes & les Ministres qui nous persecutent; iugeant du sentiment de nos cœurs par la confession de nos bouches, & de la verité de nos seruices par la publication de nostre deuoir; arresteroient le cours de cette furie, dans laquelle en cherchant nostre perte, ils trouuent celle de leur conscience, & de leur honneur. Mais la protestation de nos obligations, n'ayant pas esté assez puissante pour les toucher, nous nous trouuons obligez de leur montrer leur estat, apres auoir professé le nostre; & leur enseigner quels sont les devoirs des grands à l'endroit de leurs Sujets: afin que du moins ils cessent de nous faire du mal, par la crainte du chastiment qu'ils ne peuuent éuiter de la Iustice de Dieu, s'ils ne s'acquittent des charges qu'il a annexées à leur autorité.

I.

La premiere Maxime, & qui seruira de fondement aux autres, est: Que le Souuerain avec ses peuples ne font ensemble qu'un Corps d'Estat, dont il est le chef & ses sujets les autres parties qui le composent, chacune suivant sa dependance, sa place, sa dignité & son employ. Car comme dans le corps, chaque membre à sa structure, sa situation, & ses fonctions différentes de celles des autres, sous la direction, & les influences du cer-

veau: Ainsi dans vn Estat, la difference des conditions, & des exercices, fait cette agreable œconomie qui le compose, & l'harmonie charmante qui le maintient, sous l'autorité, & la conduite du Roy qui en est le Chef, & la partie plus noble, & dominante. Cette comparaison est si excellente, que S. Paul n'en a pas trouué vne plus facile ny plus à propos, pour exprimer l'estat de l'Eglise, & dans laquelle les Roys trouuent l'original de cette grandeur, dont ils sont les plus parfaites copies. Car si comme Chrestiens, ils sont membres de Iesus-Christ, Chef inuisible de son Estat: Comme Roys, ils sont ses Lieutenans, & Chefs visibles de l'Estat temporel, comme le Pape l'est du spirituel. Ainsi, & par proportion, ils ne font qu'un corps avec leurs peuples, comme Iesus Christ n'en fait qu'un avec son Eglise.

I l.

De cet exemple, lequel, comme disoit nostre Seigneur, comprend la Loy & les Prophetes: c'est à dire, l'Union & l'Estat du Prince avec ses Sujets, & des Sujets avec leur Prince, il n'y a personne, à moins de n'auoir pas le sens commun, qui ne voye la suite de cette seconde maxime. Que le Souuerain pour se conseruer & son Estat, dans l'ordre & la perfection d'un corps politique, est obligé de faire à l'endroit de ses peuples ce que fait la teste à l'endroit des autres parties de nostre corps. La teste est pour conduire les autres parties, non pas pour les precipiter; Le Roy est pour la direction de ses Sujets, non pas pour leur ruyne, & leur aneantissement. Dans la teste est l'origine des nerfs, pour le mouuement de tous les membres; Dans l'autorité du Roy reside la

source de toutes les puissances ne cessaires au deffous de luy, pour l'administration de son Estat. La teste par l'entremise des nerfs distribue les esprits animaux, pour les actions de toutes les parties en general, & de chacune en particulier: Le Roy par la diuersité des Magistrats, & des Officiers, doit faire la distribution de ce qui est neccessaire, tant pour la dignité de leurs charges, que pour le support, & la liberté de tous les peuples, chacun dans le repos de sa famille, dans la possession de son bien, & dans l'exercice de son art & de sa profession. le laisse toutes les autres fonctions de la teste, qui seruent d'exemple à ceux qui commandent, parce qu'elles sont notiores, & que chacun par son experience propre en peut facilement faire l'application; pour représenter seulement quel desreglement cest dans vn corps, lors que le cerueau n'est pas dans son veritable temperamment; lors qu'il a plus de chaleur que sa disposition naturelle ne requiert, d'où viennent les folies; lors qu'il retient chez soy tous les esprits animaux, d'où viennent les lethargies: ou qu'il ne les communique qu'à quelques-uns des nerfs, non point aux autres, d'où viennent les paralysies. Et que dans le grand, aussi bien que dans le petit monde, le Prouerbe n'est que trop veritable, que *lors que la teste est malade, tous les autres membres participent à la douleur.*

III.

En suite & pour demeurer dans la mesme comparaison: les Roys, les Souuerains, les Grands, & toute sorte de personnes qui sont preposees à la conduite des autres, iusqu'aux Peres dans leurs familles, ne doiuent

point proceder dans leur direction avec vne authorité ou commandement despotique. Il n'y a que Dieu qui puisse agir de cette sorte, de laquelle mesme il ne se sert point, dans les actions qui regardent sa gloire & l'intérêt de nostre salut. Les grands ne sont point independents, ny impeccables pour iouir de ce priuilege. Il faut qu'ils consultent les loix diuines & humaines, la raison, les dispositions, les consequencés & les euenemens des choses auant que de les ordonner. Sainct Paul ne veut pas que les Peres par trop de seuerité prouoquent les enfans à la colere. Quand les grands ordonnent avec trop de violence, les Sujets n'obeyssent qu'avec contrainte, & à regret. Nous n'auons iamais veu, n'y leu dans l'une & l'autre Histoire, & sacrée, & prophane, de bons succez, ny de durée, de ces dominations seueres, & de ces obeyssances forcées. Nous voyons au contraire, & lisons les desordres, les malheurs, & les ruynes, iusqu'à la dissipation des Royaumes qui en sont arriuez. Et la seule histoire de Roboam par l'ordre de la Iustice de Dieu, deuroit faire trembler tous les Souuerains, lors qu'il est question de mettre quelque fardeau sur les espauls de leurs Sujets: comme elle leur apprend, la difference qu'il y a, des conseils des Vieux Senateurs, & personnes consommées dans les affaires, & de probité; d'avec ceux des ieunes testes & sans experience, qui ne cherchent que l'establissement de leur fortune dans l'excez de leur ambition. Qui en vouldra sçauoir toutes les circonstances, n'a qu'à lire le douziésme Chapitre, du troisiésme liure des Roys, où dans le succez de l'Estat de Roboam, il apprendra quel fust celuy d'Aduram, Surintendant de ses Finances.

IV.

Et d'autant que pour vne bonne direction, les exemples, comme dit S. Gregoire, sont bien plus puissants que les paroles, & qu'une action d'un momēt persuadera plus viument, qu'une Harangue de trois heures. L'une des principales obligations d'un bon Prince, est l'exemple de sa vie, pour la conduite de ses Sujets. La raison principale, parmy vne infinité qui confirment cette maxime, est qu'ils sont l'idée & l'original, sur lequel les peuples s'estudient de se former; soit par ce qu'ils se figurent que tout ce que leurs superieurs font est bien fait, soit que par vn esprit de complaisance ils croient ne leur pouuoir estre plus agreables qu'en les imitant. Nous auons dans l'Eseriture Sainte les Histoires de deux grands Capitaines, qui pour animer leurs soldats n'auoient pour toute harangue que ces paroles, *Voyez & faites comme moy*. Or dans ceste obligation d'exemple, il faut obseruer, que les Loix qui commandent ou defendent quelque chose, sont naturelles, diuines, ou humaines: & pour les humaines, elles sont ou Ecclesiastiques, ou Politiques: c'est à dire, qui dependent de l'Eglise, ou des Princes. Pour les naturelles, diuines & Ecclesiastiques, il est sans doute, que les Roys y sont obligez, selon leur condition, comme le moindre des Chrestiens dans la sienne: & c'est vn abus de croire, que la qualité de grand porte de soy, sans autre consideration, aucun priuilege contre toutes ces Loix. Ainsi ils sont obligez d'aymer Dieu, & d'honorer leurs parens: de ieusner & pratiquer les abstinences de l'Eglise, comme les autres fide-

les: il leur est defendu de iurer, blasphemer, tuer, yro-
 gner, ravier les biens d'autrui, paillarder, sous mesmes
 peines qu'aux autres, & peut estre plus grandes à cause
 de la plus grande enormité de leur crime, tirée de l'e-
 minence de leur condition, & de l'exemple qu'ils doi-
 vent donner. Il n'en est pas de mesme, pour ce qui
 concerne les Loix Politiques, soient qu'ils les ayent
 establies, ou qu'elles l'ayent esté par leurs Predeces-
 seurs. Car tous conuiennent, qu'ils ne sont pas obligez
 à leur obseruance, par la voye que nous appellons de
 contrainte, dont le defaut porte crime deuant Dieu,
 & punition deuant les hommes. Neantmoins cela n'em-
 pesche pas que tous ne demeurent d'accord, qu'ils y
 sont tenus par cette voye que nous appellons de direc-
 tion, c'est à dire, par la force de l'exemple qu'ils sont
 obligez de donner à ceux qui vivent sous leur Iurisdic-
 tion. C'est par cette raison qu'Aristote, dit: Que tou-
 te sorte de Superieurs ont plus d'obligation de prati-
 quer la Vertu, que n'en ont pas ceux qui dependent
 de leur auctorité, d'autant que ceux-cy n'y estant obli-
 gez, que par le seul motif de la mesme vertu, les au-
 tres, outre ce deuoir qui leur est commun avec eux,
 ont encore celuy de l'exemple, qu'ils sont necessaire-
 ment & indispensablement obligez de leur donner en
 vertu de leur qualité, & de leur condition. Toute cet-
 te Theologie est Euangelique, & confirmée par l'exem-
 ple de nostre Seigneur, & ie souhaiterois de tout mon
 cœur, que les Confesseurs s'en excitassent le souuenir,
 lors qu'ils ont les grands à leurs pieds, dans le Sacre-
 ment de Penitence. Nous verrions vne autre vie, &

& d'autres exemples, & plus Chrestiens que nous ne voyons pas.

V.

Mais pour entrer plus particulièrement dans le detail des deuoirs du Souuerain, ie dis pour cinquiesme maxime, qu'il est obligé d'employer tous ses soins, & vacquer à la conseruation de la Religion Chrestienne, Catholique, Apostolique, & Romaine. C'est l'un des plus importans de ses employs, & comme l'Ame est plus que le corps, & le Createur que la creature, le premier, & le plus necessaire de tous, dont il fait le serment de fidelité à Dieu au iour de son sacre, entre les mains de l'Euesque depute de sa part, pour le recevoir. Ce seroit manquer de iugement de demander la raison de cette verité, qui se tire de la source, & du principe de leur grandeur, d'autant que la tenant de Iesus Christ, & estant ses Officiers immediats, pour les fonctions de sa Souueraineté, ils doiuent commencer par ce qui le touche de plus pres, & trauailler avec plus de soin, que pour toute autre chose, pour le maintien de la Religion, qu'il a establie par ses peines, cimentée de son sang, & confirmée par sa mort. C'est pour vn si digne sujet que nos Roys portent le tiltre de Tres Chrestiens, & de premiers nays de l'Eglise: que le Pape Honoire III. les appelle les Murs inelbranables de la Chrestienté: Urbain IV. les Soldats inuincibles de Iesus-Christ, & les Protecteurs inexpugnables de la Religion Catholique: Et Gregoire IX. le Carquois de Iesus-Christ, d'où il tire les fiesches infaillibles pour soumettre les Peuples à la Foy: & que depuis douze siecles, que nos Princes ont commencé d'estre Catholiques en Clouis, la Couronne de France n'a peu compatir avec l'heresie.

Je ne traite point la question, si vn Roy, parmy nous, peut estre heretiqué; & s'il est obligé de ne souffrir point l'heresie dans son estat: Ce sont des matieres hors de saison, & qui demandent plus de loisir pour les discuter. Suffit pour maintenant, que nous demeurions dans cette maxime constante, que le premier, & plus digne employ de nos Souuerains, doit estre pour conseruer la foy de celuy qui leur à mis la Couronne sur la teste. Ainsi ie diray franchement, que quelque sujet qu'ayent eu nos Roys de permettre ou tolerer la liberte de conscience, & la profession de l'heresie dans leur estat: Je n'en voy point, ny de raison legitime, par laquelle ils puissent sans peché, non pas permettre, mais souffrir, qu'un homme qui aura fait profession de la foy Catholique, luy fasse banqueroute, pour embrasser l'heresie, sans punition.

VI.

Que si les Roys sont obligez de trauailler pour la maintenance de l'Eglise en ce qui concerne sa foy, Ils le sont aussi également & par proportion pour ce qui touche ses libertez, ses priuileges & ses franchises. Il faudroit qu'ils ne fussent point enfans de l'Eglise, pour donner lieu à aucun doute sur cette verité. Je ne parle point de ces priuileges que nous appelons de l'Eglise Gallicane, qui ne regardent que la Iurisdiction de Rome, ie parle de ceux du Clergé à l'esgard des Princes temporels, dont les vns sont attachez aux personnes, les autres à la iurisdiction, & les autres aux biens, sur tous lesquels les Souuerains n'ont aucun droit, ny n'en peuuent exiger sans violence & iniustice. Comme tant les personnes que les biens sont tirez de la condition prophane, s'il faut ainsi parler, & politique & faits spirituels par leur de-

dicace au culte Diuin, ils sont par la mesme voye soustraits de la puissance & iurisdiction temporelle. Et pour ne rien dire des priuileges qui concernent les personnes ou la iurisdiction, Je ne scaurois m'empescher de témoigner vn peu de fiel, contre cette maxime impie & digne de ses auteurs, qui depuis quelques années, a commencé de prendre cours. Que les biens de l'Eglise appartenôient également au Roy, comme ceux de ses autres Suiets: qu'il pouuoit y mettre des taxes, des impositions, & en prendre, avec vne égale liberté sur les vns que sur les autres. Car outre qu'il est tres-faux que le Roy ayt pleine autorité sur les biens de ses Suiets, Il ne s'ensuit pas, quand cela seroit, qu'il ayt le mesme pouuoir sur ceux de l'Eglise, qui sont choses sacrées & destinées à d'autres vsages. Au contraire comme il n'a aucun droit d'y mettre la main, non plus qu'Antiochus sur le tresor du Temple, il a obligation de le conseruer, aussi bien que les personnes consacrées au ministration de l'Autel, avec leur iurisdiction, appartenances & dependances. Et ce priuilege est si autentique & naturel, que non seulement parmy les Iuifs durant la Synagogue, mais mesmes parmy les prophanes, ceux qui estoient destinez pour les sacrifices, estoient dispensés des loix, auxquelles le reste des peuples estoient tenus d'obéir. Et c'est en vertu de ce deuoir, que nos Roys ne se sont pas contentez de maintenir les droits & les libertez de l'Eglise dans leur estat: Mais en toutes sortes de rencontres ont leué de grandes armées & passé les Alpes, pour aller en Italie deffendre les droits & les immunités de saint Pierre, contre les Princes & les Empereurs, qui s'effor-

soient de les vsurper ou les diminuer.

VII.

Après les interets de Dieu par la religion, & ceux de l'Eglise dans ses immunités & ses priuileges, viennent ceux des peuples, tant pour ce qui regarde la liberté de leurs personnes, que pour celle du commerce public, & la iouissance paisible de leurs facultés, pour tous en general & chacun en particulier; Et pour cet effet, les Roys sont obligez sous peine de peché & de peché mortel, & qui traîne avec soy vne necessité absoluë de restitution de tous les torts & dommages qui leur sont faits, par leur science, tolerance ou conniuece, comme ie diray & le prouueray cy-apres par vne autre maxime Euangelique. Ils sont, dis-ie, obligez de les deffendre & proteger de la violence & incurfion de tous estrangers, qui par quelque voye que ce soit, d'hostilité ou autrement, voudroient vsurper, ou tout, ou partie de l'Estat, soit Prouinces, Villes, terres, facultés ou personnes & les soumettre sous leur domination. Car il y a vne connexité si forte entre le Roy & ses Suiets, que ie ne feindray point de dire, que comme il n'est pas permis à vn pere de desheriter ses enfans, sinon en certains cas de desobeïssance prescripts par les loix, & si extraordinaires, qu'ils arriuent moins frequemment que les Eclipses du Soleil; Ainsi il n'est pas mesme au pouuoir legitime du Souuerain, de transferer ses prouinces ou ses peuples, sous la domination d'un autre sans leur consentement, si la felonnie ne les rend dignes de ce chastiment. C'est le Domaine le plus proche & le plus naturel de la Couronne, & par ainsi inalienable selon la Iurisprudence: De maniere que

comme il y a obligation dans les Suiets d'employer corps & biens , pour la conseruation de la personne du Roy & de son Estat; il y a aussi obligation reciproque dans le Prince , d'employer non seulement ses soins , mais mesmes iusqu'à sa personne pour le repos de ses peuples , touchant leurs biens & leurs personnes , contre toute sorte d'incursions estrangeres. De là il est bien aisé de iuger, combien grand & enorme est le defect, non seulement en soy , mais en outre dans ses suites, de ceux qui au lieu de conseruer leurs Suiets, les tourmentent & les persecutent, & au lieu de leur seruir de bouclier pour leur defense, les liurent à l'estranger ou l'appellent pour les rauager & les ruiner. C'est vne matiere qui dans ce temps, ne demande que des larmes non pas des paroles.

VIII.

Mais ce n'est pas assez au Roy, de mettre ses Suiets à l'abry des estrangers par la voye des armes, lors que les autres moyens ne sont pas suffisants. Ils doiuent en suite & par la mesme loy, essentiellement annexée à leur Souueraineté , les defendre des internes & domestiques par celle de la Iustice. C'est pour cela qu'ils ont l'espée en vne main & la balance en l'autre, afin de resister aux estrangers par les armes & punir les Suiets discolles par la Iustice. C'est ce qui conserue la paix & l'vnion entre les peuples: C'est ce qui entretient la fidelité dans le commerce, ce qui met la vie en seureté dans la campagne, qui empesche les vols, les meurtres & les assassins; En vn mot, qui establit & conserue le repos dans la societé; puisque tout l'Estat n'estant composé que de bons ou de meschants, les bons se maintiennent dans leur deuoir, par les principes de la religion & la beauté

mesme de la Vertu, & les meschants sont forcez d'y demeurer, par la crainte & la seuerité du chastiment. De ceste sorte l'Estat Ecclesiastique & Politique ne sont que deux parties qui composent celuy de Dieu, dont chacune a ses supplices differens, l'Eglise ses censures, le Roy ses toritures. C'est l'explication que donne vn des saincts Euesques de nostre France S. Hildebert, aux deux glaives qui se trouuerent parmy les Apostres au temps de la Passion de nostre Seigneur. *Nosti gladium Regis ; nosti gladium Sacerdotis ; Gladius regis censura Curiae , gladius sacerdotis ecclesiastica rigor disciplina.* Il appelle celuy du Roy, censure de la Cour, faisant allusion à nostre pratique, parce que c'est principalement par les Arrests des Cours Souueraines, entre les mains desquelles le Roy a mis en depost son autorité, & par lesquelles il exerce sa Iustice vindicative, que les meschants trouuent la porte fermée à leurs fuittes, & les supplices conformes à la grandeur & à la qualité de leurs crimes.

I X.

De là s'ensuit, que les crimes enormes & publics, & dont la Religion ou l'Estat, sont notablement scandalisez ou offensez, doiuent estre necessairement punis & le scandale osté & réparé. Car encore que personne ne reuoque en doute la puissance des Roys, & que comme Lieutenants de Dieu, ils n'ayent droit de vie & de mort sur leurs Suiets, ou en leur faisant grace ou en les punissant quand ils l'ont merité: Neantmoins comme ils sont attachez aux ordres de ce Souuerain supreme, & qu'il y a des crimes, dont le pardon emporte vne suite d'inconueniens & de maux dans le public, soit pour la Religion
ou

ou pour l'Estat, quelque autorité de vie qu'ayent les Souuerains, ils ont obligation de les punir, afin des'opposer aux desordres d'un exemple pernicieux. Ainsi S. Louis prist la main de Iustice pour apprendre aux blasphémateurs, aux libertins, aux impies & aux sacrileges, à n'attendre point de misericorde de sa part, non plus que de demeure dans sa Cour. Ainsi les plus grands Princes & les plus portez à la clemence, qui est la plus noble vertu des grands, se sont fait violence, pour exercer la Iustice, iusques sur les personnes de leurs fauoris, à l'imitation de Dieu, lequel comme parle Saluian, use enuers soy-mesme d'une espece de contrainte, afin de punir les défauts & les dereglements de nostre vie. *Exacerbamus Deum peccatis nostris & ad puniendum nos trahimus inuitum.* L'Histoire sainte est pleine d'exemples de cette conduite par l'ordre mesme de Dieu, & celle de France en peut fournir bon nombre sur des personnes de toutes sortes de conditions & de qualitez.

X.

Suiuant les mesmes principes & les loix de l'Euangile, les Grands sont obligez d'escouter les plaintes & les remonstrances de leurs Suiets. Je dis suiuant les mesmes principes: Parce que tenant la place de Dieu, ils doiuent à son imitation auoir les yeux & les oreilles ouuer-tes à la souffrance & aux clameurs des miserables. Et l'ay adiousté les loix de l'Euangile, parce qu'il n'y a rien qui nous y soit si fortement recommadé, comme la compassion, ny que Nostre Seigneur ayt confirmé par tant d'exemples, dans toute la suite de sa vie mortelle, qu'il a toute passée parmy les pauures, afin de voir leurs necessi-

tez. Les prophanes ont esté dans ce sentiment sans estre éclairé d'autre lumiere que celle de la raison. Vne femme se presenta vn iour à Cesar, luy demandant audience, à quoy ayant répondu qu'il n'auoit pas le loisir. *Cessez donc* (repartit-elle) *d'estre Empereur.* En effet, ce seroit vne chose monstrueuse & qui rendroit vn pere barbare, s'il n'auoit point d'oreilles pour écouter les prieres de ses enfans. Que deuiendrait tout vn peuple dans les oppressions, si son Prince luy refusoit sa protection? A qui aura-t'il recours contre la violence des Puissans, l'iniustice des Magistrats, la rapine des Partisans & de toutes sortes de sang-suës, si celuy qui a la supreme autorité ferme l'oreille à ses plaintes? Faudra-t'il instruire vn procez & obseruer toutes les formalitez de Iustice, toutesfois & quantes qu'un peuple sera mis au pressoir? & en cest estat mesme qui en fera le Iuge si le Souuerain ne l'est pas? Qui iamais a ouï parler de la cruelle Theologie de certains Predicateurs, lesquels (par quel esprit Dieu le sçait) ont eu, à ce qu'on dit, la hardiesse de prophaner la sainteté de la Chaire, & attenter à la pieté naturelle de la Reyne, en luy voulât persuader, qu'elle n'estoit pas obligée d'entendre par elle mesme les clameurs des peuples, & que ses oreilles ne doiuent point estre ouuertes à toutes sortes de plaintes, quoy que publiques? A quoy donc seront-elles ouuertes? A qui? A la flaterie & aux tyrans, afin qu'en ayant iamais de connoissance des oppressions des miserables, son cœur ne soit point touché de compassion, & qu'à la moindre remonstration, on les luy represente comme rebelles. Ah non! Iesus-Christ nous apprend vne autre conduite; Et

les Grands qui doiuent rendre compte à sa Iustice, de l'administration de cette eminente qualité, qu'il leur a donnée par dessus leurs freres, deuroient souhaitter, s'il se pouuoit faire, que leurs yeux fussent comme ceux de Dieu, auxquels rien ne peut estre caché, non pas mesme les pensées les plus secretes de nos cœurs.

XI.

Mais ce n'est pas assez d'escouter les remonstrances & les plaintes, il y a en suite obligation d'y mettre ordre & de trouailler au soulagement. Vn Medecin ne seroit pas beaucoup à rechercher ny à estimer, qui apres auoir escouté vn malade dans le recit de ses douleurs, & luy auoir fait cent demandes sur les accidents diuers de son indisposition, s'en retourneroit sans luy rien ordonner. Il se trouueroit peu de seruiteurs qui voulussent s'engager dans vne maison, dont le pere de famille au lieu de leur donner du pain, ne s'opposeroit pas à ceux qui le leur rauiroient, où mesme permettroit de le leur rauer. On peut former mille autres comparaisons, tirées des diuerses conditions des hommes qui portent superiorité, & qui sont toutes assemblées, vnies & confonduës, dans la Royale & souueraine. De cela nous auons vn beau document dans l'Ecriture Sainte, lors que les familles dans leurs necessitez ayant besoin d'un Roy, & choisissant entr'elles, celuy quelles iugeoient le plus digne de cette grandeur, il leur respond en cette sorte, *le ne suis pas Medecin, il n'y a point de pain dans ma maison, faites-élection de quelque autre pour vostre Roy.* Monstrant par cette façon de parler, que comme vn Medecin doit donner des remedes aux ma-

lades , & vn pere de famille la nourriture à ses enfans & à ses seruiteurs , Vn Prince par proportion doit faire l'vn & l'autre, à l'endroit de ceux que Dieu a soumis sous sa conduite & sa Iurisdiction. Ainsi quand au lieu de les guerir on les blesse , lors qu'au lieu de leur donner du pain on le leur oste, ou que pour du pain, comme dit l'Euangile , on leur presente vn scorpion, il n'y a personne si priué de sens commun , qui ne voye , qu'elle est la grandeur du crime & l'enormité du peché.

XII.

Les Roys sont dans l'Estat, ce qu'est le premier mobile dans le Ciel, qui par son impression agit tous les cercles inferieurs, & leur donne les mouuements diuers dont chacun a besoin , afin de conseruer l'ordre que Dieu a estably pour la perfection de l'Vniuers. Ils sont à l'égard de leurs peuples , ce qu'est le Soleil à l'égard des autres Planettes , & de toutes les choses sublunaires , auxquelles communiquant sa lumiere & ses influences , sans les refuser à aucune, iusqu'au centre de la terre , il ne les distribue pas pourtant par proportion arithmetique & avec vne égale profusion , mais selon la portée & la condition de chacune en particulier. Et cet ordre, que le premier mobile & le Soleil obseruent inuiolablement sous celuy de Dieu , apprend aux Souuerains celuy qu'ils doiuent tenir, s'ils ne veulent point pecher dans la distribution des charges & des Offices; qui est de les donner aux personnes , dont la science & les mœurs répondent à cette qualité. Que l'on voye dans l'Ecriture Sainte la regle que Dieu donna à Moysse pour l'élection des Magistrats , & les qualitez dont ils doi-

uent estre ornez, pour estre esleués à ce degre^l de superio-
rité, & l'on cognoistra facilement les maux & les desor-
dres, auxquels la venaliré des charges a ouuert la portedás
l'Estat. Et il est bien estrange, qu'on veuille demâder plus
d'âge, de merite & d'experience à vn Iuge, afin de don-
ner son suffrage, lors qu'il ne s'agist que du bien tempo-
rel des peuples contre la violence des sang-suës; que l'on
n'en exige pas, lors qu'il est question de luy donner la
puissance sur le sang & la vie des hommes. Si les char-
ges & les offices estoient donnés gratuitement & au meri-
te, le Roy seroit mieux seruy dans son Conseil & dans sa
Maison: La Iustice seroit administrée avec plus d'inté-
grité quelle n'est pas: Les peuples ne seroient pas expo-
sez à la torture qu'ils endurent; & les Roys ne seroient
pas responsables, comme ils sont, à la Iustice de Dieu, de
tous les maux qui par cette occasion se commettent
dans leur estat.

XIII.

Ce que nous venons de dire, touchât les charges & les
Offices, il en faut dire de mesme & dauantage s'il se pou-
uoit, pour ce qui concerne les Benefices. Car comme
le seruice de Dieu est le premier & le plus important de
tous les deuoirs, aussi y a-t'il plus d'obligation de n'ad-
mettre à ce ministere, que des personnes qui par leur
merite puissent s'en acquitter dignement, & par la pro-
bité de leurs mœurs, seruir d'exemple d'une vie verita-
ment Chrestienne. Et ie ne le dissimuleray point, ny
ne me tairay iamais dans cette rencontre, puisque la
gloire de Dieu & le salut de mon Roy y sont interessez.
Quelque droit & autorité qu'ayent nos Roys de confe-

rer les Benefices, il n'est pas en leur pouuoir, sans pe-
cher mortellement, de les donner à des personnes inca-
pables, (soit par faute d'aage ou de merite) d'en acquit-
ter tous les deuoirs, ainsi que Dieu le demande pour
leur salut. Le Pape mesme, ny les Euesques, ne peuuent
pas en bonne conscience en disposer autrement: Durant
le temps des élections publiques, ceux qui auoient droit
de suffrage estoient obligez d'observer cette Loy. Et ie
n'estime pas qu'il y ayt personne, qui olast soustenir,
sans passer pour ridicule, que la puissance des Roys dans
la collation des Benefices, soit plus grande que celle des
Papes, des Euesques, & des peuples lors qu'ils auoient le
droict de choisir des Ministres pour l'Autel. Nous ap-
prenons de la vieille Loy, que le déreglement de ceux
qui estoient ordonnez pour les Sacrifices, fust cause d'v-
ne infinité de malheurs dont les peuples furent affligez.
Que sçauons nous, si la iustice de Dieu n'est pas irritée
contre la France, pour le mesme subiet? N'est-il pas hon-
teux, pourné dire dauantage, de voir les Benefices, aussi
familiers que les biens patrimoniaux? Les Ecclesiasti-
ques prendre le titre de leur maison non pas celuy de
leurs Benefices? Des Prelats chargez de mitres & de croi-
ses, sans faire aucune fonction pastorale? Des Abbez fri-
sez, poudrez, le visage couuert de mouches, estre tous les
iours dans vn habit de libertin, parmy les cajoleries des
cours & des tuilleries, pour ne point parler des suites
malheureuses, d'vne vie si insolente & si libertine. Et
tout cela par les liberalitez d'vn Roy tres-Chrestien, d'v-
ne Regente toute confite dans la vertu, & dans vn mi-
nisteriat, tout Ecclesiastique, & tout Religieux.

Il y a encore vne chose à cōsiderer dans l'estat des Souuerains, qui n'est pas de moindre consideration ny importance, pour le repos de leurs Sujets & la seureté de leur conscience, qui est, qu'ils ne peuuent auancer quique ce soit, ny en biens ny en dignitez, au detrimēt ny au preiudice d'autrui. Cette Maxime est de lōgue estendue à qui en voudroit faire l'anatomie selon toutes ses parties: car elle comprend tout ce qu'on pourroit proposer touchant l'aduancement des Fauoris, le changement & la mutation des charges, offices & Benefices, la disposition des Gouuernemens des Prouinces, & des conduites militaires. Je diray seulement, que comme tous les biens sont biens de grace, de corps, ou de fortune; Pour les biens de grace ils ne sont pas en la disposition des Roys. Pour ceux du corps, quelque autorité qu'ils ayent sur eux, ils ne peuuent pas oster la vie, ny mettre en captiuité vne personne, afin de satisfaire à la passion d'un Fauory, ou aux troubles d'un songe ou d'une imagination. C'est vne Theologie qui ressent trop du Machiauelisme pour auoir passeport parmy des Chrestiens. Et pour ce qui regarde ceux de fortune, qui consistent, ou en possessions, ou en offices, il n'est pas moins certain qu'ils ne peuuent les oster aux vns pour les donner aux autres, quelque pretexte qu'on puisse prendre, s'il n'y a de la maluersation ou de la forfaiture. Toutes ces veritez sont notoires par elles-mesmes. Il n'y a que les flateurs ou les impies qui osent dire, que le Roy peut, quand il luy plaist, oster les biens, les charges, les Offices, & les Benefices à ceux qui les possèdent, pour les faire passer en d'autres

mais, si par quelque crime notable ils n'ont point mérité cette punition. Ce sont des artifices de la faueur, & qui n'ont cours parmy nous que depuis quelques années, afin de s'aduancer & de se maintenir, mais qui sont contraires à l'Euangile & qui damnent les Souuerains, sous vne apparence flatteuse, de puissance & d'autorité.

X V.

Je passe sous silence quantité d'autres devoirs, inseparables de la grandeur, & dont l'induction feroit la matiere d'un gros volume, pour dire, Que les Princes & les Souuerains, sont estroittement liez & obligez à toutes ces fonctions par vne double loy, Sçauoir, la Naturelle & la Diuine. Pour ce qui concerne la loy Diuine il est sans difficulté, puis qu'estant establis de la part de Dieu & exerçant sa puissance sur les hommes, ils ne peuvent point sans peché, passer les limites qu'il leur a prescrites. Mais pour ce qui regarde la loy naturelle, d'autant qu'il y peut auoir de la difficulté, cela merite quelque explication. I'en'entends pas, par cette façon de parler, que l'establissemēt de la Royauté soit de droit naturel, l'Escripture improuue cette imagination; Mais ie pretends & veux dire, que posé qu'il y ait des Roys & des Souuerains, de quelque source que vienne l'origine de leur institution, ils sont par vn principe naturel & par vne loy inseparable de leur autorité, obligez sous peine de crime, à tous les devoirs, fonctions & exercices, que Dieu a annexe à cette suprême grandeur. Comme vn pere est obligé par la loy naturelle de pouruoir à l'education de ses enfans. Comme vn Maistre par la mesme loy doit
nourrir

nourrir & recognoistre ses domestiques. Comme vn Pasteur par le mesme principe est tenu de veiller à la Garde de son troupeau; Vn Medecin d'observer ce qui est necessaire pour le soulagement de son malade; & le Capitaine pour la conduite de ses Soldats: Vn Roy qui à toutes ces qualitez ioinctes ensemble, & essentiellement vnies à sa couronne, doit apprendre de tous ces exemples, que si sa grandeur par les charmes de l'autorité luy flatte les sens, les perils qui se rencontrent dans vne administration de si grande estendue, & dans l'enciclopedia de tât de deuoirs, le doiuent extrêmement humilier aux pieds de nostre Seigneur & l'obliger de luy demander les graces puissantes & necessaires, pour ne pas succomber sous vn si pesant fardeau.

Bartholomaeus de Ruonob XVI. capitolo

Toutes ces obligations d'un Prince envers ses peuples, durant le temps de la plénitude de sa puissance, passent dans les personnes des Régents ou Regentes durant celui de sa Minorité. Je veux dire, que tout ce qu'un Roy est obligé de faire selon Dieu, pour la conduite & la conseruation de son Estat; Les Régents ou Regentes sont tenus par les mesmes loix, diuine & naturelle, & sous les mesmes peines de le pratiquer à l'endroit du general & du particulier. Certe Maxime ne demande point de preuve. La qualité de Tuteur & d'Administrateur d'un pupile porte avec soy l'explication & l'intelligence toute entiere. Et pour nous seruir de l'exemple present, si sa Majesté Régente, se sent obligée pour le maintien de l'autorité du Roy, de faire vio-

lence à sa pieté naturelle, & vser de feuerité sur vn peuple innocent, seduite qu'elle est par vn conseil interesse: A quoy n'est elle pas obligée & que ne doit-elle pas faire, pour la descharge de sa conscience deuant Dieu, & le repos de son salut eternal? Estant certain par principe Euangelique, Chrestien & naturel, que tous les pechez qu'un Prince peut commettre contre son deuoir en l'administration de son Estat, les Regens qui representent sa personne les commettent, s'ils ne s'acquittent des mesmes deuoirs.

XVII.

De ces Maximes generales & vniuerselles, j'en tireray quelques particulieres, pour l'esclaircissement & le repos de la conscience de la Reyne Regente, dans les occasions deplorables de nos iours, & que nous auons de la peine à croire, encore que nous les voyons & les souffrions, tant elles sont extraordinaires & sans exemple. Premièrement: Que sa Majesté est obligée à la iustice de Dieu, pour ne point parler de celle du Roy, d'esloigner le Cardinal Mazarin, de sa presence, de son Conseil, de sa Cour, & de son Estat. Toutes les loix conspirent ensemble pour ce subject. Toute l'Europe n'a qu'un cœur & qu'une langue pour demander cét acte de iustice. La guerre & la diuision des Royaumes, l'exige pour son Vnion & pour la Paix. La misere dans laquelle les peuples gemissent, à peine peut par autre voye trouuer son soulagement. L'Auersion Vniuerselle des grands & des petits, sans excepter les Officiers de leurs Majestez, ny ceux mesme qui semblent luy estre les plus fauorables & les propres Domesti-

ques, est vne marque infailible de l'enormité de ses
defauts irreparables par vn moindre chastiment. Les
abus dans les charges, Offices & Benefices; L'expe-
rience deplorable de sa mauuaise conduite; L'excez
prodigieux de ses despesces & de ses richesses en si peu
de temps; Les inuentions criminelles, dont il s'est ser-
uy, pour eleuer sa fortune sur les ruines de la France;
Les Arrests prononcez contre ses attentats sacrileges;
Le scandale actif & passif, qui estonne tout le monde,
par la resolution constante, que sa Majesté tesmoigne
à le retenir; sont autant de demonstrations sensibles, de
l'obligation qu'elle a de l'esloigner, sous peine de pe-
ché mortel, sans en pouuoir receuoir l'absolution, tant
qu'elle le retiendra dans sa Cour & dans l'Estat du
Roy. Et quelque accommodement que l'on puisse faire,
cela n'est bon qu'à l'esgard des hommes, mais à l'esgard
de Dieu, le scandale seul demande cela de sa iustice, sur
laquelle les hommes n'ont point de pouuoir. N'y a il
pas assez de testes Françoises & mieux timbrées que la
sienne pour le Conseil? N'y a il pas des mains plus fortes
que les siennes pour l'exécution? qui a il donc, qui puis-
se contre l'auerfion du Ciel & de la terre (s'il faut ait si
parler) obliger de retenir vn Estranger, avec le peril
mesme de l'Estat, qu'un attachement d'esprit, suiuy d'au-
tant de pechez pour sa Majesté, qu'il cause de mal-heurs
sur les peuples & de perils en vn Estat, qui ne luy ap-
partiennent point en propre, & à la conseruation des-
quels elle doit particulièrement trauailler par le de-
uoir de son administration.

Mais ce n'est pas assez, pour la descharge de la conscience de sa Majesté, de l'esloigner de l'Estat, qui n'est qu'une reformation presente, ou une precaution & securité, pour l'aduenir. Elle est encore obligée, sous peine de respondre au Tribunal de Dieu de tous les crimes commis & à commettre, de faire cesser les violences & les excez qui se cōmettent à cette occasion: & en outre de restituer tous les vols & les pillages, & reparer tous les torts, les outrages & les desordres, qui ont esté causez à Paris & aux enuiron, tant en general qu'en particulier, depuis le depart du Roy, la nuit de la Feste des Roys. Ceste Maxime qui semble dure à ceux qui ne sont point versez dans la Theologie, est l'une des plus vniuersellement recogneuës dans la Morale Chrestienne. Il n'est pas permis sans subject legitime, de faire aucun tort à autrui. Et quand mesme il y auroit quelque subject, Dieu nous a donné la iustice pour en auoir la reparation, on nous ordonne de pardonner & de luy en laisser la vengeance. Et comme le bien d'autrui, n'est pas à nous, & qu'il n'y a point de puissance dans la terre qui puisse dispenser de la restitution: Sa Majesté peut iuger de la, si elle veut ouurir les oreilles à la verité, en quel Estat se trouue sa conscience parmy tous ces malheurs? De rendre aux Eglises les ornements, les Croix, les Calices & les Cibouires qu'on a sacrilegement enleuez, elle le peut avec facilité. De satisfaire tant à ceux de la Ville que de la campagne, pour les dommages qu'ils ont receus en leurs facultez, cela se peut aysement, puis qu'il n'y va que du bien, ou l'on peut remedier par

une

vne infinité de moyens : Mais de satisfaire à Ie-
sus-Christ pour les outrages qu'il à receus en
sa personne au Sacrement Adorable de son
Corps, arquebuzé & foulé aux pieds : & de
rendre aux filles la pudicité, qui leur a esté ra-
uie avec tant d'insolence, en la presence mes-
me de celuy qui doit estre le Iuge & le ven-
geur d'une injure si atroce ; le demande avec
qu'elle monnoye on peut s'en acquitter, &
quelle penitence, suiuant les Canons de l'E-
glise & l'ordre du Concile de Trente, peut
recompenser ces defauts, dont le simple re-
cit faiët horreur & ne peut estre escouté, qu'a-
uec douleur ? O Dieu ! O Sauueur ! Vn rayon
de cette lumiere dont la chaleur change les
cœurs.

FIN.

H

PERMISSION.

La Cour a permis à Cardin Besongne d'imprimer, vendre & debiter le present Liure intitulé, *La suite des Maximes Morales & Chrestiennes*. Et deffenses à tous autres de l'imprimer, sur peine de confiscation des Exemplaires contre-faits. Fait à Paris le 22. Mars mil six cents quarante-neuf.